

Date – 03/11/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma leh Guwahati High Court Chief Justice, Justice Ashutosh Kumar chu nimin khan an inkawm.
2. Rawthing tam avanga sazu puangin chhungkaw 5,622 thlawhhma hectare 2,331 point 154 a zau a tihchhiatsak tawh.
3. ISRO chuan Communication Satellite rit ber CMS-03 chu hlawhtling takin Sriharikota atangin a kapchhuak.
4. ICC Womens Cricket World Cup ah India Women's ODI team an champion

<><><>

CM

Chief Minister Pu Lalduhoma chuan Mizoram tlawha lo zin Guwahati High Court Chief Justice, Justice Ashutosh Kumar chu nimin khan thingpui a inpui a.

Chief Minister hian Mizoram sorkarin Judicial Infrastructure lama hmasawna a neihte a hrih bakah hmachhawp a neihte pawh sawipuiin Mizoram State Human Right Commission din chungchanga hmalak mek dante leh thil pawimawh dang enge maw zat a sawipui a ni.

Justice Ashutosh Kumar hian Chief Minister chungah lawmthu sawiin Judiciary lama Mizoram sorkar hmalakna a fak a, a ngaih pawimawh thilte a thlen bawk.

An inkawmna hi Justice Michael Zothankhuma, Guwahati High Court Judge chuan a telpui a ni.

<><><>

EXCISE & NARCOTICS

Mizoram Excise & Narcotics department-in kumin January atanga September ni 15 thleng khan heroin kg 29 leh gram 210 an man tawh a, hemi chhung vek hian methamphetamine kg 182 leh gram 936 an man tawh bawk.

Excise & Narcotics department hian September ni 15 thleng khan Ruihhlo kaihnawihah mi 724 an man tawh a. Narcotic Drugs and Psychotropic Substances Act, 1985 hmangin thubuai 409 an ziaak lut tawh bawk a ni. Excise & Narcotics Department chhinchhiah danin kumin January ni 1 atanga October ni 16 thleng khan Mizoramah ruihhlo vangin mi 73 an thi tawh a.

Hemi hun chhunga ruihhlo vanga thi zinga mi 27 hi heroin vanga thi an ni a. Excise & Narcotics Department-in a chhinchhiah chinah kumin January 1

atanga October ni 16 thlenga ruihhlo vanga thi mi 73 hi kum 19 - 57 inkara upa an ni a; mipa 61 leh hmeichhia 12 an ni. Ruihhlo vanga thi mi 73 zinga 27 hi heroin ti thin niin, a bak mi 46-te hi ruihhlo chi khat aia tam tihpawlh thinte an ni. Excise & Narcotics Department hian Mizorama ruihhlo vanga thi zat hi kum 1984 atang khan a chhinchhiah tan a, kumin October ni 16 thleng khan kum 42 chhungin ruihhlo vanga thi mi 1,952 an awm a, mipa 1,714 leh hmeichhia 238 an ni. Kum 42 chhunga ruihhlo vanga thi mi 1,952 te zingah hian spasmoproxyvon emaw parvon spa emaw hmang thin mi 1,161, heroin ti thin mi 299 leh ruihhlo chi khat aia tam tihpawlh thin mi 492 an ni.

Tun hnaiah Mizoram chhungah ruihhlo veivak a pun nasat avang leh thalai zingah ruihhlo hman sual a hluar tak em avangin hemi beih letna atan hian Mizoram sawrkar chuan Police, Excise & Narcotics Department leh Central YMA nen tangkawpin thla 4 awh turin ruihhlo do beihpui, “Operation Against Trafficking and Use of Drugs and Narcotics” chu September ni 1 atang khan kalpui a ni. He ruihhlo dona beihpui thlak mekah hian Myanmar ramria inkalpawhna leh ramri dep khuate ngaih pawimawh hmasak a ni a. Heng ramri depa awm khaw 22 te chu tlawh chhuah vek tawh niin khawtlang hruaitu – VC, YMA, VDP leh MHIP te nen hmalak dan turte tha takin ruahmanna siam a ni.

A kaihhnawih Department leh pawl hrang hrangte ruahmanna leh thawhhona rah hmuh tur a awm tan a, Excise & Narcotics Department leh Central YMA tangkawpin khawlaia ruihhlo ngaite thenfai hna thawkin Police Department leh ramri chhehvela khawtlang tlawmngai pawl hrang hrang tanghovin ramriah nasa takin ruihhlo lut tur vengin an thawk bawk a, hemi avang hian beihpuithlak a nih hnu hian Mizoram pumah ruihhlo veivak a tlahniam nasa hlein hriat a ni. Excise & Narcotics Department leh CID (Crime) hnuaia Special Narcotics PS ten tualchhunga ruihhlo an man zat a tlahniam a, ruihhlo man pawh a pun phah hle tih hriat a ni. Mizoram Police chuan ram leh hnam venhimna tura sawrkar, VC, YMA leh pawl hrang hrang tangkawpin ruihhlo do beihpui a thlak mekah misual leh ruihhlo tawlh report kawngah te thahnemngai taka thawhpui a, theihtawp chhuahpui zel turin mipuite an ngen a ni.

<><><>

METH SEIZURE

Inrinni a Excise & Narcotics department thuchhuahin a sawi danin Champhai district Excise & Narcotics hnathawkte chuan kar kal ta Zirtawpni khan Champhai Zion Veng leh Vengsangah Methamphetamine kg. 5 leh gram 11 (mum 50,500) an man.

He ruihhlo tawlhthu a rinhlelh Sahanoor Alom (26) Assama Karimganj district mi leh Golap Hussain (32) Tripura-a Sepahijale Distret mi ni-a inchhal te chu an man a. Ruihhlo phurhna atana an hman ni a hriat Car pawh an hren sak nghal a ni a. Heng ruihhlo neitu-a puhte hi Narcotic Drus & Psychotropic Substances Act, 1985 hmanga thubuai siam sak an ni a. Zirtawpni vek, chhun dar 12:30 khan Ramhrangkawn, New Champhai-ah Methamphetamine kg 10 leh gram 100 leh a neitu nia hriat mi pahnih – Zamsianmanga (41) Khawmawi, Myanmar leh Ronald Liana (26) Tahan F Group, Myanmar (tuna Lianhna, Myanmar a awm mek) nia inchhalte chu an man bawk.

Zirtawpni vek khan Champhai District & Session Court-a hruai niin Jail-ah dah luh nghal an ni.

<><><>

THINGTAM

Rawthing tam avanga sazu puangin chhungkaw 5,622 thlawhhma hectare 2,331 point 154 a zau a tihchhiatsak tawh.

Agriculture & Farmers' Welfare department hotute sawi danin rawthing tam avanga tuartu chhungkaw 5,622 amite hi district 11 a khaw chuang ni a chhutte hi Mizoram district 11 a khaw 170 aia tlem lova a chengte an ni a. Sazu puangin thlawhhma a tihchhiat zau zawng hi lakkhawm mek a ni a, November ni 10 khi chuan Mizoram puma buh leh thlai tihchhiat zat Chiang leh felfai zawka puan theih an inbeisei thu an sawi a. Thingtam sazu puangin thlawhhma a tihchhiat hi nasa takin a pung chho a. September thla tawpa Lunglei district ringawtah loneitu chhungkua 121 thlawhhma a tihchhiat lai-in tun hnaiah chuan chhungkaw 719 thlawhhma an seh tawh a ni. Lunglei district bikah hian a tira khaw 11 lekin an tawrh laiin tunah chuan khaw 19-in nasa takin an buaipui tawh a, kuthnathawktute thlawhhma a tihchhiat phei chu an pung nasa hle a, a huhova tur hmanga sazu hrai pawh an bei nasa hle a ni. Serchhip district-ah pawh Zawlpui, Chawm, Chamdur, Thliarpui, Lumtui, Tuichar, Zuangleng, Zehtet, Thuhruk, Lungbu, Luitdam, Tuisen leh Lathei khaw thlawhhma-ahte Serchhip Joint VC leh Agriculture department hnathawkte'n a huhova sazu hrai runpui chu Zirtawpni khan an huaihawt bawk a.

Sazu tur hi Agriculture & Farmers' Welfare department tam tham tak an sem chhuak tawh niin an sawi a. Rawthing tam avanga kuthnathawktute tawrhna leh hloh hi state specific disaster a puang turin Disaster Management & Rehabilitation-ah ngen mek a ni a. He lama thuneitu sang ber state disaster management authority (SDMA) chu an chairman, chief minister hove thukhawm thuai tura an beisei thu dawn a ni. Puan a nih chuan rawthing tamin a hrin sazu puang avanga an buh leh bal leh thlai tam tak chantute hi zangnadawmna pek theih a beisei-awm thu Agriculture & Farmers' Welfare department hotute chuan an sawi a ni.

<><><>

LADC POLLS

Lai autonomous district council (LADC) inthlan tur chu hun rei vak lova puan anih a rinawm.

LADC ding lai hun hi December ni 18 khian a tawp dawn a, chumi hma ngei chuan inthlan buatsaih a nih a rinawm tih kan corr chuan a sawi a, State election commissioner Dr. H. Lalthlanglana'n LADC inthlanna lo awm tur atana inpuahchah dan dinhmun thlithlai turin vawiin hian Lawngtlai a tlawh ang.

Pu H. Lalthlanglana hian vawiin vek hian inthlanna buatsaihna atana mi pawimawh, district official-te, police hotute, tlawmngai pawl leh kohhran hruaitute nen inthlanna atana inpuahchahna chungchang an sawiho ang a. A thlana thlan member of district council (MDC) 25 awmna LADC inthlan lo awm tur atan hian vote nei thei tur tih chianna (final electoral roll) pawh September ni 30 khan tihchhuah a ni tawh a, LADC ah hian vote nei mi 56,857 an awm mek a, an zinga 29,013 hi hmeichhia an ni a, mipa 27,844 an awm bawk

a. Polling Station- a Vote awm tamna ber chu vote 1,189 awmna Pangkhua a ni a, Polling Station- a vote tlemna ber chu vote 1 chauh awmna Hmawngbuchhuah a ni.

Inbuatsaihna dang pawh kalpui mek a ni a. Lawngtlai district bawrhsap Pu Donny Lalruatsanga leh SP Pu P.C. Lalchunglura te pawhin khaw engemawzat an tlawh kual tawh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

EMCC VIOLATION

Dampa biala bye-election lo awm tura vote an zawnna-ah chief minister Pu Lalduhoma leh adviser to CM (health) Dr. Lorrain Lalpekliana Chinzah te election model code of conduct (EMCC) bawhchhia a puhna chu vawiin hian Election Commission of India a thawn thlak hman rin a ni.

Chief Electoral Officer (CEO) pisa atanga thudawn danin chief minister leh adviser to CM te laka MNF-in EMCC bawhchhia a an puhna hi rorellai ZPM chuan a chhang tawh a. Chu chu Mamit bawrhsap, district election officer (DEO) ni bawh leh Dampa bial bye-election a returning officer (RO) te'n an ngaihdan an thawh chu CEO lam hian an lo enfiah ve leh a. An hmuh dan chu election commission-ah an thawn thla ang a, commission hian thutlukna a siam dawn a ni. CM leh adviser to CM te EMCC bawhchhia a puhna hi MNF party aiawhin ukil Pi Zothansangi Hmar chuan a thelut a. Pu Lalduhoma chu October ni 21-a West Phaileng khua a ZPM candidate tana a campaign-na-ah Reiek khua leh a chhehvel khaw 14 chawm tur cheng vaibelchhe 770 ruahman a nih tur thu a puan chu inthlan dan bawhchhiatna a ni a ti a. Dr. Lorrain Lalpekliana'n October ni 17 khan Parvatui leh Phulpui West khua-ah a thlawna damlo inentirna hun huaihawtin damdawi pawh a thlawnin tam tham tak an sem a ni a ti a. Hei pawh hi EMCC bung II(j), bung VIII (3) leh (14) bawhchhiatna chiang tak a ni a ti.

Dampa bial khaw thenkhata a thlawna T-Shirt sema BJP puhna chu Mamit district DEO chuan EMCC bawhchhia a puhna thubuai a ziaklut bawh a. Hemi chungchang insawifiah tura BJP hruaitute a tihna chhan a nih hnu-ah la ngaihtuah zawm tur a ni ang. He tih lai hian Aaam Aadmi

Party (AAP) Mizoram chuan PWD Minister Pu Vanlalhlana chu EMCC bawhchhia-ah an puh bawh a. Pu Vanlalhlana hian October ni 3 khan Phuldungsei khuaa a campaign-na-ah North East Special Infrastructure Development Scheme (NESIDS) hnuaiah Pukzing leh Silsury kawng, truck kal theihna a siam tura awm vek tawh chu ZPM candidate Pu Vanlalsailova a tling lo a nih chuan ngaituah nawn a ngai leh tur anga sawi ni a an sawi chu mipui vaubehna leh EMCC bawhchhiatna chiang tak a ni, an ti a ni.

<><><>

ISRO

ISRO chuan Communication Satellite rit ber CMS-03 chu hlawhtling takin Sriharikota atangin a kapchhuak.He satellite hi tunlai thiamna changkang ber ber hmanga thuam niin India Navy te tana duan a ni a. LCM3-M5 rocket hmagin Andhra Pradesh-a Satish Dhawan Space Centre atangin kahchhuah a ni.Prime Minister Narendra Modia chuan ISRO te hlawhtlinna a lawmpui thu sawiin ram hmasawнна tura an hnathawh chu fakawm a ti a. Union Minsiter of State for Science and Technology, Dr.Jitendra Singh pawhin ISRO te chu an hlawhtlinnaah a lawmpui thu a sawi..

<><><>

ICC WOMENS

ICC Womens Cricket World Cup ah India Women's ODI team an champion. Nizana Navi Mumbaia final inkhelah India hmeichhe team te hian South Africa chu run 52 in an hneh a. ICC Womens ODI World Cup-a India team an champion hmasak ber tum a ni a. India team te hian vaw hmasa in run 299 an siam a. South Africa hian an 246 siamin chak tura run mamawh zat tlin loin an out fai vek a ni.

<><><>